

四庫全書

集部

欽定四庫全書

明詩綜卷三十二

翰林院檢討朱彝尊編

許讚一首

讚字廷美靈寶人弘治丙辰進士累官少傅兼
太子太傅吏部尚書文淵閣大學士贈少師謚
文簡有松皋集

感遇

主人凌晨起灑埽坐當楹屋東有茂樹其上鳴梟鳴主
人心所惡彷徨巡檐行亟命伐此樹庶幾遠惡聲僕言
梟可射樹伐難再榮毋以小失大事當論重輕

劉麟一首

麟字元瑞本安仁人先世以武功襲南京廣洋
衛副千戶遂家焉中弘治丙辰進士除刑部主
事歷員外郎中出知紹興府削籍徙居湖州起
知西安府擢雲南按察使謝病歸尋起太僕寺

卿遷副都御史巡撫直隸復引疾再起大理寺

卿改刑部右侍郎陞工部尚書卒謚清惠有南

坦老人集

王元美云元瑞詩如癡女兒能織鴛鴦自謂藝絕改繡鳳皇更無此鳥可

以發笑

靜志居詩話尚書由二千石登三九之列數棄官以去好為山水之游流寓長興之南坦自號坦上翁與孫山人一元龍僉事霓及茗中名士吳琬施侃等結詩酒社號茗溪五隱年八十餘被褐坐小舟赴岷山會人不知為鉅公也嘗請浚川預作墓銘可云達天知命者矣顧華玉贈詩云琴鶴居何定蓴鱸味獨偏王履吉寄詩云鸞鶴諧真賞瑤華贈遠人孫太初詩云閉門句

好香殘後擣藥聲高月
上初其風流可想見也

南坦讀書臺

盡洗侵輿竹來聽轉壑泉
萬花齊映谷五柳欲飛緜
弱子將迎婦翁許借錢
讀書臺下雨種玉比藍田

陶諧一首

諧字世和會稽人弘治丙辰進士累官兵部左
侍郎贈尚書謚莊敏有南川漫游橐

詩話南川詩未知津數
與空同酬唱吾服其膽

晚宿峽石

迢遞羣山合，逶迤一徑通。
半村無夕照，空谷自天風。
轍亂嶺岬上，年衰道路中。
客懷增闕寂，新月翳疎桐。

劉玉十二首

玉字咸栗，萬安人。弘治丙辰進士，除知輝縣。入
為御史，歷南京左僉都御史、董江防，後至刑部。

左侍郎有執齋集

楊用修云：古詩歌行，妥帖排入古作者之室，五七律

雖唐人何多讓焉

詩話康陵南巡將臨新文僊喪詞臣撰祭文均
不稱旨御製文云朕居東宮先生為傳朕登大
寶先生為輔朕今南游先生已矣嗚呼哀哉當
時代言之臣咸歛手歎息嘉靖中王新建沒執
齋侍郎作祭文云嗚呼公之才拔乎其萃嗚呼
公之學出乎其類嗚呼公之功疇克似之嗚呼
公之壽竟止于斯亦可謂言簡而意盡矣執齋
當宸濠之變正理江防馳檄師中與喬莊簡將
角克固疆圉其功有足錄者詩
頗娟秀絕塵比于莊簡似過之

夜坐

暝色閔琴書
開軒對明月
微雨卷薄雲
疎星聚成列
孤蹤棲鳥定
羣響蟲聲歇
緬懷塵外人
高枕宵鐘徹

祕獄

牆隙風來無蹤翻書卷衣袂使我燈燄閃爍如青蟲嗟
風伯來何從清明明庶成化工乾坤大噫土囊小胡為
牆隙如吹筒嗟嗟風伯省厥躬

百舌

百舌鳥何佻巧啼遍上林音裊裊雌雄喚雨雄雄晴鷓
鴒欲住鷓欲行一鳥一舌尚難定爾有百舌能無爭人
生言出慮禍入一言之失駟不及三寸舌在中禍機咄

爾百古無是非

志怪

紀歲丁丙戌夏四月廿六靖浪之民家黃牯身孕犢一
項而二首各具口耳目五月十四日丙申金壇農婦生
怪人頭方四角面青而六眼高額凹鼻獠牙鳥喙如山
精手足一節具一爪墮地鬼叫連三聲歛然起走擊乃
斃創見此怪吁可驚七月望仍丙申日異牛又產南陽
邑二首相同項亦分心肺雖分身尾一聞之嗟嗟稽占

書無乃世降生形殊反身修德天可格祥桑枯死安無
虞

石鍾山歌

石鍾山何高哉雙巖競秀江之隈初疑端人秉笏立朝
署又疑靜女把鏡臨妝臺長江萬里如奔馬彭蠡淵泓
匯其下乾坤陶冶質本虛波濤撞擊聲非假春風浩蕩
秋月明蛟龍鼓舞鯨鼉鳴或如巨鑪震東序或如棧劇
和琴笙水石相搏豈人力石鍾千古留佳名山僧叩石

誇奇絕南音含胡北清越山川靈異石偶同至理寧容
三寸舌我來訪古將誰從酈元李渤東坡翁枕流洗耳
了無得倚闌目送雙飛鴻忽憶高皇此停蹕龍旗一掃
羣兇畢鐘乎鐘乎爾善鳴為予汛埽磨厓石

聞甘肅有警寄榕溪公

驛吏傳邊報羌人犯肅州極知兵士苦誰解聖明憂調
集晨分竈供輸夜唱籌早期青海靖定遠舊封侯

寄咸肅兄

江頭日日候歸船
南北東西路幾千
旅館夢迴常徹夜
故園書去動經年
愁連郢樹雲初合
思入湘潭月又圓
莫道少年堪久別
高堂華鬢亦蕭然

越王臺

章遂江流去不回
江邊今有越王臺
年深往事憑誰問
春盡野花空自開
落日每隨孤鳥沒
好風時送片帆來
登臨却喜青山在
猶勝阿房化劫灰

顏瓌墓

顏公沛令廬陵人也建文末死

社稷安危隻手支綱常輕重此心知未驅玄武門前騎
已拔丹陽鎮上旗千古夷齊真義士百年忠孝有佳兒
荒墳偏灑行人淚泗水東流無盡時

蓮花澱

平堤一望盡湖光橋北橋南路短長漁父水中圍曲箔
行人水上引拖牀

送行

日日都門送別離道傍楊柳已無枝西飛白日東流水

不放行人住少時

懷歸

鑑湖之水清且漣中有二頃桑麻田故人有約不歸去
老却黃花又一年

黃衷
三首

衷字子和南海人弘治丙辰進士歷官兵部右

侍郎有矩洲集

鍾仲實云矩洲歷官所至皆有題咏晚年謝事丘舉寄興不倦

其詩整而俊婉而有則宏博而不肆

詩話矩洲詩無根核興到筆酣間與曩篇暗合
若野練晴飛孤嶼白水棉春試小枝紅白酒河
橋花底社黃螺沙市蜚家兒處處短垣圍牡蠣
家家生計種扶留鳥際忽開衡岳寺林端恰下
灌江船桐木歸來津口渡楊花飛
過驛南樓狀南中風景歷歷在目

益陽紀事

潭州楚南郡獷黠俗易傲伊昔炎宋時控禦恒署帥惟
我神聖朝綏靖亦數世去年五百峒椎牛立赤幟居氓
棄業走行旅盡心悖俄聞益陽菁倡亂渠首二敢叛假
息恩遂揭怒車臂豈緣科率煩厥咎在長吏我時移鎮

來集議詢根蒂米聚山川形陣列犄角勢團夫里抽壯
甲長家舉義風霆驅號令狼兇各殲殪鷙猛安可常覆
轍戒前事慎爾血氣軀毋使腰首棄

萬縣

川東十數州此地事征權驤販浮大航蠻實日交錯算
緡及銖釐刺穎倒囊索追惟作法誰主者及倖幕先王
御盛世賦稅且云薄未造計舟車諒非明哲作刀錐將
盡爭何以抹民瘼厲禁如可除商旅永和樂

雨

自從人日雨漠漠決旬連漸綠磯頭草仍迷夏口船雷聲喧浦近農事憫時先楊柳東門色春寒幾度眠

湯沐一首

沐字新之江陰人弘治丙辰進士除崇德知縣入為御史累官大理寺卿有廷尉集

秋日寫懷

黃菊秋來已滿籬青山于我久相期孤燈對酒不成醉

遠道逢秋更覺悲，祇恐病侵垂老日。
不妨貧過未官時。
沅湘欲起東歸櫂，竹杖芒屨任所之。

陳 霽一首

霽字子宇，吳縣人。弘治丙辰進士，改庶吉士，授
編修。忤劉瑾，勒致仕。瑾誅，復館職。歷國子監祭
酒。有玉堂成，均歸田。諸豪燬于火，僅存葦川集。

藏于家

詩話：祭酒古之遺直。為史官時，面責劉瑾，謂古
者刑不上大夫，大廷非行杖之所。且言劉公健。

謝公遷皆顧命大臣君無故一旦去之恐非所以保貴富之道瑾對以廷杖正統年有之公曰此姦邪王振所為爾瑾爭曰王振死土木之難忠臣非姦邪公作色曰此賊幾覆社稷何忠之有理曰編修借王振罵我邪銜之欲置公死地以丁母憂僅免其後又劾江彬幾為彬所陷歸田澹退尤人所難詩草被焚

從其裔孫錄手彙一首

過楊二郊居

白石芳郊路清谿舊竹扉橋通湖水近樹入隴雲微蘋
葉漂波冷鱸魚上釣肥村醪沽不遠落景未言歸

熊卓 三首

卓字士選豐城人弘治丙辰進士授平湖知縣

徵拜監察御史有熊御史選

王元美云熊士選如寒蟬乍鳴疎林

早秋非不清楚恨乏他致顧玄言云侍御才華警拔一句一字酷尚初唐已得王楊風采持

少深致穆敬甫云熊詩如西子解顏萬夫婉變黃清甫云卓詩所存最少不過四十篇出

自北地所刪殆無遺珠矣而不足

以振然其短調楚楚亦自清發詩話張光世集為康德涵所定熊士選詩為李獻吉所刪兩君俱有才名不應牽率若是疑所

汰者金而所存者沙矣

送王衍之還陝和廷實韻

擾擾郊門道沙寒驛路微烟花行客晚京洛故人稀
野岫孤雲沒春山獨鳥歸秦川隱關塞一望一沾衣

出居庸

沙上望行人日暮愁心絕江南四時春邊地五月雪

送客城南

楊柳河橋外春風倒玉壺離情不可道江路滿蘼蕪

趙鶴二首

鶴字叔鳴江都人弘治丙辰進士歷官山東提

學副使有具區集

顧華玉云叔鳴詩恥凡語于古愛謝靈運于唐愛孟郊于

元愛劉因嘗曰此道不宜淺淺則庸冗下矣其登泰山金焦諸篇言言自作更不隨人真凌駕

千古膽也

詩話李獻吉登岱詩日抱扶桑躍天橫碣石來宗子相稱之謂有芥視岱宗斗量滄海之致若叔明山壓星辰從下看海浮天地自東迴亦警句也

登岱

一上遙岑萬丈蒼天風應為襲衣裳雞鳴往往看初日
人語時時到下方雲暗鐘聲連海樹春浮花氣入山堂

扶藜不淺登游興祇怪興丁喚客忙

蓬萊閣觀海

蓬萊高閣晚涼開倦客乘涼坐未回不住鳥聲衝雨過
有時龍起帶潮來愁雲尚識田橫島仙月還虛漢武臺
回首夕陽瀛海上一尊懷古獨徘徊

汪循一首

循字進之休寧人弘治丙辰進士官順天府通

判有仁峯文集

老去

老去心還競春來花又新未應行樂地偏愜少年人

戴銑二首

銑字寶之婺源人弘治丙辰進士官南給事中

以論劉瑾削籍贈光祿少卿

武城晚眺

野曠蒼烟合城昏白日斜
暮隄千樹柳負郭萬人家
小舫明漁火高樓隱暮笳
寂寥江上立羈思滿天涯

經古鄭州

城勢尚蜿蜒風光異昔年民垣官舍瓦兔穴戰場田古
樹無秋色殘碑有暮烟興衰亦常理臨眺却淒然

朱諫八首

諫字君佐永嘉人弘治丙辰進士歷官贛州知

府調吉安謝病歸有蕩南集

俞汝成云君佐詩多自得之趣不規

規于聲調格律

詩話蕩南近體足自名家

清明日泊揚子江

楊柳夾江青東風潮正平雲間旋蜃市沙際聽鼉更萬
水俱東逝孤舟更北征不知時序改今日是清明

入清河

柳葉初凝綠桃花正滿林河流移故道海色變層陰午
夜一帆月征人萬里心風沙吹欲老短髮不勝簪

寓江心寺

孤嶼清秋夜星河萬里查江山如有約雲水暫為家白

髮隨鷗鳥輕舟采石華秋風動歸思淅瀝響蕪葭

冬日奚蘭室老友見訪喜而有作

江村寒月客來稀坐對梅花半掩扉燈火最憐清夜話
溪山偏愛舊人歸酒樽欲盡還堪瀉世路無情已息機
相見不須悲白髮山林鍾鼎總成非

章孝夫鴈麓山莊

陰陰竹樹繞山根石徑雲深蕩北村無數落花浮水面
盡隨鷗鳥到柴門鉤簾靜對千峰月種藥新開五畝園

長日南牕事高卧謾將風景說桃源

瑤川新漲同魏海南泛舟

草煖風和二月天江南鰕菜不論錢
前溪昨夜添新漲一葉中流范蠡船

夜坐

金爐火盡不聞香銀燭無光春夜長
想見落花千萬朵盡隨風雨下池塘

寄曾良用

幾度南樓坐夕曛十年消息隔江雲歸來又向江頭別
只見梅花不見君

黃相一首

相字弼甫莆田人弘治丙辰進士有一溪集

槿樹花歌

日出花始開日沒花已落明日花開笑落花不知向暮
還如昨人間勢利自有時田實相傾徒爾為獨不見東
陵瓜達人守法奚咨嗟予如不我信聽歌槿樹花

唐錦一首

錦字士紉上海人弘治丙辰進士除知東明縣
入為兵科給事中歷江西提學副使有龍江集

近山

卜得幽居傍翠屏
澗泉偏愛枕邊聽
曉來嵐氣衝簾入
濕透牀頭相鶴經

唐寅九首

寅字伯虎一字子畏吳縣人弘治戊午舉南京

鄉試第一坐事下獄放歸有六如居士集

顧華玉云

伯虎棄落之餘益任放誕殉節體物託興歌謠
罔避俳文務諧里耳雖作者不尚其辭君子可
以觀其度矣 祝希哲云子畏詩初喜穠麗既
仿白氏務達性情佳者多與古合 袁永之云
子畏築室桃花塢中讀書灌園家無儋石而客
常滿坐風流文采照映江左謂人生貴適志何
用劇心鏤骨以空言自苦故其著述多不經深
思語殊俚淺 王元美云唐伯虎如乞兒唱蓮
花落其少時亦
復玉樓金埒

詩話六如淪落明時恒賣畫為活故其詩云領
解皇都第一名猖披歸卧舊茅衡立錐莫笑無
餘地萬里江山筆下生又云青衫白髮老癡頑
筆硯生涯苦食艱湖上水田人不要誰來買我

畫中山誦之悽然足以悲矣然于畫頗自矜貴
不苟作而詩則縱筆疾書都不經意以此任達
幾于游戲此表永之輯其集僅存少年之作實
未足以盡其長余於集外從畫卷錄其留題絕
句八首饒有風致未至
如乞兒唱蓮花落也

驄馬驅

悠悠驄馬驅道阻歲云晚豈無同袍士念子不能飯木
落辭故枝去家日以遠鳴雞戒前塗夕暝猶策蹇筋力
已非舊淚下不可卷

題雲山煙樹圖

雲山烟樹靄蒼茫
漁唱菱歌互短長
燈火一村雞犬靜
越來溪北近橫塘

贈感慈鄒先生畫

騎驢八月下藍關
借宿南州白塔灣
壁上殘燈千里夢
月中飛葉四更山

呈何先生畫

青雲閣榭泉聲隔
黃葉關河鴈影來
別有詩人好懷抱
西風雙鬢一登臺

曉起圖

獨立茅門嬾拄筇
鬢絲涼拂豆花風
曙鴉無數盤旋處
綠樹枝頭一綫紅

野寺

野寺空林落照低
微鐘烟樹使人迷
逢僧只道山門近
不覺穿雲又過溪

雪景

重重樓閣凍雲連
煙樹蒼茫帶瀑泉
一夜空山千丈雪

草玄人在玉壺天

墨菊

故園三徑吐幽叢一夜玄霜墮碧空多少天涯未歸客
借人籬落看秋風

題畫

日長深閉竹廬眠席下猶餘紙裹錢檢點雞棲牢縛草
夜來有虎飲山泉

劉龍一首

龍字舜卿襄垣人弘治己未賜進士第三累官
南京吏部尚書贈太子太保謚文安有紕巖集

送謝同年邦用之湖廣僉憲

曲江花底記同遊十五年來鬢欲秋
楚國旌旄新寵渥謝家人物舊風流
君山雨霽簪螺髻漢水春深漲鴨頭
樽酒已空山已夕微茫煙樹隔仙舟

林廷棉一首

廷棉字利瞻閩縣人弘治己未進士歷官太子

太保工部尚書贈少保謚康毅有小泉臺

江南曲

鳥鳴花樹繁春滿江南道不見花下人但坐原頭草

蔣瑤一首

瑤字粹卿歸安人弘治己未進士由御史出知

荊揚二府累官工部尚書加太子少保卒謚恭

靖

詩話康陵南巡近侍希帝意旨欲刷民間女子
恭靖公知揚州府事語江彬等曰揚州女子少

多受聘不便奪之無已則知府一女在得旨斯
進耳乃罷時山陰汪清憲先生知泗州中使傳
旨令進美人善歌吹者先生奏言泗州婦人荒
陋無可應勅臣向民間訪桑婦儻納之宮中俾
受蠶事庶于治化有裨事亦得寢二公彊直頗
相類而康陵未嘗震怒亦足見帝德之寬大矣
相傳駕旋時恭靖為彬等繫于舟中三日不食
驅令送駕所騎馬受奪止攜一被墊驢背夜則
寢焉抵臨清徒跣行岸上康陵遙望見之曰是
蔣知府邪可速遣還方得免維揚人感之入髓
春秋尸祝至今恭靖以宮保尚書予告林居者
二十年入峴山社詩不多作惟秋社一律僅存

丙午秋社和我齋半溪聯句韻

湖上閒居繫遠心羣公蘭楫幾回臨衣冠聚處多鄉里

存沒筵前換古今野寺浮橋煙樹暝斷碑斜日蘚苔侵
從教津鼓催歸數且倚窪樽亭柱吟

孫緒一首

緒字誠甫故城人弘治己未進士歷官太僕寺

卿有沙溪集

李時遠云沙溪瀛洲才子所作清新典麗足以名世

詩話沙溪無用閒談足資國史之采擇詩不見佳

居庸關官舍

一徑中開萬里橫居民無地問農耕霜催木葉晚山赤

雨溜石苔秋水清沙鳥遠從天外度寒蛩苦愛夜深鳴
峯巒徙倚休回首何處孤雲是故城

王守仁 十首

守仁幼名雲生字伯安餘姚人弘治己未進士
授刑部主事改兵部坐救戴銑忤劉瑾杖闕下
謫貴州龍場驛丞旋復南京刑部主事改吏部
歷員外郎中遷南太僕少卿轉鴻臚寺卿拜左
僉都御史巡撫南贛陞右副都御史論平宸濠

功擢南兵部尚書封新建伯卒贈侯謚文成從

祀孔子廟庭有陽明先生集

王元美云伯安詩少年有意求工而

為才所使不能深造而衷于法晚年歸于道學尚為少年意象所牽不能渾融而出于自然自負若兩得而吾以為幾于兩墮也又云王伯安如長爪梵志彼法中錚錚動人穆敬甫云王

公功業學術振耀千古固不必論其詩而詩亦秀拔不可掩其殆兼舉哉又云王詩如披雲對

月清輝自流顧玄言云先生經國大手博學通達詩非所優然有幽思逸致陳卧子云文

成才情振拔少年頗擅風雅自講學後多作學究語遂不堪多錄

詩話新建勲業氣節文章皆可甲世特多講學一事讒言惟興彞尊少聞先君子之言矣心齊

顏子之學也良知不動心孟子之學也大學思復戴鄭之舊定論蕪息鵝鹿之爭仁智之見各殊枋墨之歸斯受其後流而為禪者門弟子之過也今就先生之詩觀之其過濂溪祠云瞻依多少高山意曾向圖中識面真讀易詩云乃知先天翁畫畫有至教題武彝壁云溪流九曲初諳路精舍十年始及門示程畢二子云紫陽山下多豪俊應有吟風弄月人則先生何嘗立意樹幟張弧與洛閩諸儒異乎乃訾訾之口以先生學術未純并先生大節疑焉皦皦素絲欲染為緇彼諧人者亦太甚矣

山石

山石猶有理山木猶有枝人生非木石別久寧無思愁

來步前庭仰視行雲馳行雲隨長風飄飄去何之行雲
有時定游子無還期有生豈不苦逝者長若斯已矣復
何事商山行采芝

諸生

人生多離別佳會難再遇如何百里來三宿便辭去有
琴不肯彈有酒不肯御遠涉見深情寧予有弗顧洞雲
還自棲溪月誰同步不念南寺時寒江雪將暮不記西
園日桃花夾川路相去倏幾月秋風落高樹富貴猶塵

沙浮名亦飛絮嗟我二三子吾道有真趣胡不攜書來
茆堂好同住

寄友用韻

懷人坐深夜帷燈暖幽光耿耿積煩緒忽忽如有忘玄
景逝不處朱炎化微涼相彼谷中葛重陰殞衰黃感此
客游久經年未還鄉伊人不在目絲竹徒滿堂雲深雁
書杳夢短關塞長情好失無數願言覲終償惠我金石
編徽音激宮商馳輝不可即式爾增予傷馨香襲肝膂

聊用中心藏

別湛甘泉

行子朝欲發驅車不得留驅車下長坂顧見城東樓遠
別情已慘況此艱難秋分手訣河梁涕下不可收車行
望漸杳飛埃越層丘遲回岐路側孰知我心憂

古道

古道當長坂肩輿入暮天蒼茫聞驛鼓冷落見炊煙凍
燭寒無燄泥爐濕未然正思江檻外閒却釣魚船

興隆衛書壁

山城高下見樓臺野戍參差暮角催貴竹路從峰頂入
夜郎人自日邊來鶯花夾道驚春老雉堞連雲向晚開
尺素屢題還屢擲衡南那有鴈飛回

元夕

去年今日卧燕臺銅鼓中宵殷地雷月傍苑樓燈彩淡
風傳閣道馬蹄迴炎荒萬里頻回首羌笛三更謾自哀
尚憶先朝多樂事孝皇曾為兩宮開

龍潭夜坐

何處花香入夜清
石林茅屋隔溪聲
幽人月出每孤往
棲鳥山空時一鳴
草露不辭芒屨濕
松風偏與葛衣輕
臨流欲寫猗蘭意
江北江南無限情

寄浮峰詩社

晚涼庭院坐新秋
微月初生月滿樓
千里故人誰命駕
百年多病有孤舟
風霜草木驚時態
砧杵關河動遠愁
飲水曲肱吾自樂
茅堂今在越溪頭

山中示諸生

桃源在何處西峯最深處不用問漁人沿溪踏花去

周倫一首

倫字伯明崑明人弘治己未進士累官刑部尚書贈太子少傅謚康僖有集

雨霽登馬鞍山

春暮日始霽尋幽憩山牀洞壑石衣冷幡幢松雨香悠然倚雲閣極目塵沙場

張琦 七首

琦字君玉鄞縣人弘治己未進士除南大理評事歷寺正陞興化知府歷福建左參政致仕有

白齋竹里館二集

王元美云張君玉如夜蛙鳴露自極聲致然不脫淤泥中

李杲堂云先生詩吐咀山川驅使雲鳥草木與一時詞人絕不同

詩話白齋于李何詩教盛時別出機杼專以宋人為師句如人到明年一過客吾當十日九揮毫千村土犬月照雨半夜江魚潮入田天上星辰離舊次夢中山水作真游離歌對酒無三疊殘暑先秋退一分十里長亭留短樹滿天晴日落黃沙濕螢燄竹火依火疲馬出郊山復山路

入林低潮裏樹山行月黑虎窺人殘年滯雪開
新歲五日敲冰過一州古刹今僧相見少新篁
舊竹長來齊水邊地冷苔生髮山外民貧竹有
花入之誠齋安晚集中猶上駟也弇州方之夜
蛙鳴露說者以為過而白齋出郭詩云
一部新詩一部蛙則作者先以自喻矣

遊長山

偶偕羣從遊騎馬秋山冷笑應谷聲揚鞭亂江影入
山尚未深而有山棲境紅子落長藤蒼苔覆簪井短棘
刺我衣朔風吹我領飢腹覓蕨根健步出松頂樵人四
五家炊烟忽生暝問樵何處山云是丹霞嶺龜勉越崇

岡豁然見高景飛鳥盪習至浮雲暗生脰陟高原自平
可以發深省

黃昏步溪上見煙月可愛

明月在天煙在溪煙中看月無光輝沙禽熟眠潮未響
野火歷亂船初歸天邊楊柳誰家樹烟月相含不知數
此時幽景記不真莫是江南夢歸路

次夜又步溪上

月夜不減昨夜好秋霽家家夜飯早蔓青芋子白酒香

土門竹舍黃花老農談悠悠靜可聽皆說官家今太平
斗斛上倉不過槩差船點馬無兼丁翁哺弱孫婦抱子
依依相對桑麻裏我願明月常此光不照離愁照歡喜

秋晚登君山

十年兩醉君山酒山下民風似昔年青帕茜裙耰麥女
銀鱸紫蟹入村船霜焦葉破猶藏寺江浦沙高未作田
病骨登臨尚彊健坐聽湘瑟弄湘煙

梨園教曲圖

金史四庫全書
卷三十三
梨花千樹雨初收上苑春風吹未休新製樂章音調澀
勅教依舊唱伊州

合和驛南望彌望皆白土

當時戰血有餘腥白土經年草不青留得遺民幾家在
夕陽村裏掘蕪菁

溪家

紫絮茅花飛入門淺溪幽響出籬根溪家老婦閒無事
落日呼歸白鼻豚

都穆一首

穆字元敬吳縣人弘治己未進士授工部主事

歷禮部郎中乞休加太僕少卿致仕有南濠詩

略

顧華玉云少卿文簡古有法詩雖故爾沖泊竟非俗韻胡孝思云元敬詩宗陶孟

詩話祝希哲九朝野紀徐昌穀剪勝野聞往往紀載非實惟都少卿南濠文跋西使記金薤琳瑯聽雨紀談事必稽核蓋篤學之士也相傳吳中有娶婦者夜大風雨滅燭徧乞火無應者衆皆曰南濠都少卿家當有讀書燈在叩其門果得火齋居乏食笑曰天壤間當不令都生餓死先民風節如是詩無足錄存約一斑

吳江竹枝詞

雙櫓艫船無比輕耳邊惟聽踏車聲
龍王堂下風波惡誰似儂心耐得驚

張鳳翔一首

鳳翔字光世洵陽人弘治己未進士除戶部主事移病歸卒年三十有伎陵集

詩話伎陵集洵無足錄蒙叟請獻吉黨護作傳然其集本獻吉評點初不假借不以為近俳即以為太實或譏其篇章雖多事重意複或評其蘊蓄有餘變化未至惟卷末數篇云流動工緻

所謂吾見其進也是無異師之視弟子若其文
有擬彭澤士夫送陶潛解任歸序詆之曰此篇
疑未覩歸去來辭而作則侮人太
甚矣蒙叟黨護之論殊不其然

宮詞

社燕花梢翠尾分
玉樓斜度語朝曛
卷簾忽趁東風入
誤落芹泥濕鳳裙

謝廷柱六首

廷柱字邦用長樂人弘治己未進士除大理評
事歷官湖廣按察僉事有雙湖集

詩話邦用詩如屏
塵在握淨埽游塵

水亭夜坐

今夜月上遲前夜月上早有月景固佳誰識無月好天
高衆星明涼意在庭草風輕螢照樹夜定魚在藻毛髮
動蕭爽塵襟滌煩燥時序倏將代浮生嗟易老北鴈今
已南游子在遠道昨夢江田村石林淨如埽獨坐望海
亭把酒看雙鳥

茶園市伍家候大巡

微風散輕陰
日色在雲裏
出郭天氣佳
游行心自喜
肩輿歷青原
瀾瀾見溪水
農家住林藪
前山若屏几
因話田與桑
欣然憶鄉里

九月六日早發新化

出郭問前路
度溪望千峰
曉雨送薄寒
碧嶂迴秋容
人言秋思悲
我愛山色濃
歸興儻如此
宦情渾已慵
故園黃菊花
正及茱萸鍾
佳節不負人
江海愧浮蹤

過彭澤縣

挂帆過匡廬，棹舟向江縣。彭澤舊知名，淵明今不見。巖松露沾蓋，堤柳風拂面。雖非當時物，過客生愛戀。公如素玉姿，不以緇涅變。又如瑤臺鶴，凡鳥亦知羨。我欲賦弔詞，清詩公所擅。我欲酹一觴，薄酒不堪薦。漲澤曉乘舟，秋濤夜馳傳。區區葵藿心，瑣瑣芹曝善。因公懷昨非，歸里今得便。

夜泊石門

斜陽阜林驛，暗月石門橋。雨暴桑難葉，煙村柳未條。客

懷空耿耿春事竟寥寥今夜舟中夢闌山翠欲漂

宿永峰不果踰十里改宿桐林

數程過百里天色已黃昏客問溪頭館農歸樹裏村雞
豚各籬落烟火幾柴門乘夜求安枕桐林更上原

明詩綜卷三十二

欽定四庫全書

明詩綜卷三十三

翰林院檢討朱彞尊編

周用 十首

用字行之吳江人弘治壬戌進士除行人授南
給事中陞廣東左參議遷浙江按察副使改山
東歷福建按察使河南右布政使以副都御史
撫南贛召還理院事陞吏部侍郎尋遷南京右

都御史進工部尚書改刑部復召入為左都御

史秩滿加太子少保轉吏部尚書卒贈太子太

保謚恭肅有白川集

王道思云白川俊才博學橫行制作之林王伯穀

云公詩渾而雅清而質

靜志居詩話白川十齡能畫長師石田翁得其指授詩則別裁風格取法杜陵集中詩云畫品仍游藝詩家特擅名丹青乃餘事金石自希聲散地方盤礴諸公孰老成輞川稱二絕早晚慰平生蓋以摩詰自喻也余嘗見公畫龍戲浪穿山蜿蜒升降百年絹素雲霧猶濕至寫平坡放犢亦不減史道碩厲歸真乃知公藝事兼能不惟以經濟文章重也

清都

惟昔游清都眷茲固難忘此日復何日真宰垂謙光合
沓來天人羽儀紛成行被髮乘麒麟赤脚踏鳳皇層霄
何鬼鬼瓊宮互相望六丁啓九關稽首朝紫皇執皇顧
之笑置我玉座旁當筵舉北斗為我酌酒漿一酌好顏
色再酌生樂康義和鞭白日回車息扶桑夜半聞天雞
九州但茫茫

思古

古人不可見要見古人心義皇日已遠河嶽徒高深焉
知千載後無人復思今為君歌所思清風激商音

恥菴

子車古有訓人不可無恥悠悠下千載聞者乃興起清
風濯厚顏伊人欲何俟西山伯夷薇東海魯連水願言
謝賢達毋獨為君子

謝趙宗伯惠米蔬

一行作法吏俛首事案牘凡百慎期會惴惴憂覆餗朝

廷務寬大幸不蒙顯戮奪俸十二月一千九百斛平生
愧素飽遠謀鄙食肉薄罰分所甘入市求脫粟同年松
雪翁早歲辭厚祿有田西湖濱耕穫任僮僕豈惟充倉
箱亦以給賓族使者持書來顏色照牆屋傾奩流白脂
粒粒如選玉病夫笑開顏一月噉糜粥漑釜汲新泉為
報午炊熟推枕加一餐屬厭捫我腹勿藥信有喜便可
謝休沐尚懷緇衣詩為公且三復

耕雲

桐丘先生笑開口問我湖田不知畝一卷神農百穀經
今日居然落我手農夫十耦牛十角公家什一我什九
大田之稼歲十千與公歲歲為春酒

聞詔

哀痛開新詔孤臣海上還塵沙新肉骨涕淚舊江山罪
薄神明後生餘齒髮間君恩知莫報益厚野人顏

厓山二首

天王海上難為國猶恨祥興似景炎千里有心求馬骨

六宮無力挽龍髯已聞南劔仍開府何事前軍早解嚴
欲把椒漿酹坏土厓山風急雨纖纖

何人決策幸揚州可是諸公為國謀但肯十年嘗越膽
不妨九世復齊讎中原肉骨餘孤子諸將功勲待列侯
聞說舊時南渡後有人進講魯春秋

吳太常諸公九日前一日登清凉寺次韻

清秋何處迴高眼山寺遙臨江水濱滿地黃花聊避俗
誰家白酒未嘗新可憐明日是九日為問閒人能幾人

且與山靈修故事已傳西北靜風塵

秋思

黯黯湘雲斷九疑娟娟山月照峨眉西風楊柳渾搖落
莫向江亭賦別離

魯鐸三首

鐸字振之景陵人弘治壬戌進士改庶吉士以
編修使安南累官南國子監祭酒贈禮部侍郎
謚文恪有蓮北使交東廂諸集

李本寧云先生思深而不苦骨

勁而不屬情婉而不蕩事核而不僻
氣平而不餒山林廊廟各適其體

詩話文恪以清德稱恒曰人嘗敲得菜根則百
事可作君子以為名言歸田日築已有園于宅
東賦之曰其蔬則有芥菘葵莧蘆菹菠菰芥苗
嶺表山藥土中春間剪韭秋高折蔥豆多豉扁
瓜備西東瓠較五石為劣芋譬蹲鴟狀同蘇子
瞻所云我與何曾同一飽不知何苦食難豚也
又曰安予分之所遇今求予心之所好苟沒世
其有稱兮奚外身而有校又曰人生信亦有涯
兮嗟世事之莫盡往者幸于免咎今來者可諉
于余分達生之言猶恐修名之不立庶異乎莊
老之指矣

古塔灘

古塔灘注山窪飛湍屈曲如奔蛇中流惡石故激怒跳
珠濺雪紛交加鏘鏘爭走萬甲士刺刺倒露千狼牙官
舟一葉百夫挽安危祇與毫釐差我時攀巖過絕壁四
顧莫非猿所家倦來坐石却俯看握拳吐舌生咨嗟九
龍山史好奇甚哦詩但道山水佳更嗔來日舍舟去磨
崖不及親鐫過

鳧洲即事

見說瓜堪摘閒過洲上來小船風打去半日未能回

莊居漫興

田間事事雖畢村裏家家未閒惟有東湖隱者但從屋

後看山

徐問

五首

問字用中武進人弘治壬戌進士除廣平推官
召為刑部主事轉郎中出知登州府調臨江遷
長蘆鹽運使歷廣東左布政以右副都御史巡
撫貴州拜兵部侍郎改禮部進戶部尚書謚莊

裕有養齋集山堂萃亭

俞汝成云尚書詩不刻鏤以為工然辭旨平正

足以
諷人

詩話尚書五律清高深穩歌行如山雞野鶴自
啼舞赤日照耀神仙宮懸厓石壁置臺觀凌虛
下瞰馮夷宮寒潮涌日下孤島潮
回響聒晨昏鐘頗具謫仙風骨

和孫太守朝望登毗盧閣

與客登層樓鉤簾瞰幽壑秋色動遙林千厓自空廓俯
視清川流或見沙鳥落涼飈拂襟袂閒雲漾飛閣書臺
藤蘚荒伊人久云邈餘香有叢桂三巖風前萼

歲暮

海濱歲云暮草木尚莽蒼玄枵隱化機羣蟄寂餘響誰
云果不食有復繼茲往充然天地心生息在反掌况乃
青陽交和風遍穹壤陽德嘉再亨吾亦觀吾養重關靜
喧囂性定道心長百年日斯征撫事集遐想惟當務崇
德不媿茲俯仰

夜發蕭灘

驛小臨官道沙長帶水城山於雲處沒星過渡邊明瑣

瑣非初志營營慨此生北堂凝望遠秋日萬重情

卧病

竟日還歌枕秋風動客歌青山愁處遠白髮病來多
生計只書卷故園空薜蘿時時問雙鯉欲寄洞庭波

早發煙渚

雨色江頭樹青烟夾路長遠村迴寂寞白鳥去微茫
楚客歸何日春江正可航因思雲嶠句心折不成章

何塘

三首

唐字粹夫懷慶衛人弘治壬戌進士改庶吉士
授編修轉修撰謫開州同知稍遷東昌府同知
陞山西提學副使改松江擢南太常寺少卿署
翰林院事歷工部右侍郎改戶部復改禮部陞
南京右都御史贈工部尚書謚文定有柏齋集

詩話文定講學兼明禮儀樂律其撰許魯齋祠
堂碑稱魯齋以躬行為急而不徒事乎語言文
字之間道以致用為先而不徒極乎性命之奧
且言近世之士有志乎聖賢之道必留心性命
至于修齊治平之方義利取舍之分多忽而不
省夫性與天道夫子罕言而四教之施必以文

行忠信則其先者可知已持論甚篤實詩特其餘事然如九日和韻從肺腑中流出此等作無論字句之工不工也

和郭杏東九日韻

重陽細讀黃花句懷抱因君一暫開杜甫當年長作客
陶潛此日定銜杯殊方久廢登高興青眼誰憐濟世才
北望親闈腸欲斷塞鴻頻到少書來

題淮浦卷

長淮之水東南流美人家在淮上頭滄波碧石有深趣

朝史暮經無外求東風側耳聽黃鳥夜月卷簾招白鷗
畫圖一見擬相訪何處元龍百尺樓

李時一首

時字宗易任邱人弘治壬戌進士累官少傅兼
太子太師吏部尚書華蓋殿大學士贈太傅謚
文康有薇花堂集

夏日偶書

卜居地愛城西僻野水春來自作渠戶繞山光堪對酒

園收柿葉好供書青林雨過煙蘿濕碧沼雲生石竇虛
長者不聞門外駕小庭新草手間除

葉相一首

相字良臣江都人弘治壬戌進士歷官刑部侍郎
贈右都御史

史江皋約游芙蓉莊阻雨

細雨芙蓉徑衝泥客到稀橋分平野闊江入曲池微花
怯寒輕墮鶯愁濕不飛高雲掩片月容易送春歸

林茂達一首

茂達字孚可莆田人弘治壬戌進士官至大理

寺卿有翠庭集

讀淮陰侯傳

帶礪盟寒霸業空將壇寂寞幾西風中原草樹葬秦鹿
雲夢旌旗出漢宮人代古今雙淚眼王侯天地一樊籠
赤松始識神仙侶圮下無慙黃石公

王尚絅二首

尚絅字錦夫邾縣人弘治壬戌進士授兵部主事改吏部歷員外郎中出為山西左參政調四川引疾歸補陝西遷浙江右布政使有蒼谷集

李時遠云蒼谷詩嚴整可觀

詩話蒼谷結仲默為姻婭訂獻吉德涵子衡庭實粹夫諸君為衿契然其詩如入邪徑狹巷未達周行較之升堂入室之彥尚遠馬伯循序之止許其能取友可謂善于立言然其身後鄉里私謚曰貞孝文子則文采風流雖不及諸君而孝行有足尚者獻吉贈詩云宏詞振宛洛一阿中音呂未免所好也

土門

蒼蒼土門口日出逢樵叟問爾何事來山中苦無酒

蔣仲

舒云五絕如此一氣者勝

送白德明之太原

十載高名專百里舊遊山水入新詩雲中樓閣開王屋
春水田疇繞晉祠

陳霆三首

霆字聲伯德清人弘治壬戌進士刑科給事中

正德初謫判六安州歷山西提學僉事有水南
集

墨布袍

游提刑抗節不仕

墨布袍粗且黑心中事背中墨宋時遺黎元版籍寒暑
晴雨寧暫釋直教蓋棺覆我首領纏我骨死不在閩廣
生苟依木石安能易彼章與黻俛首躬身福州伯

銀簪詞

沈回奴死節

爺孃養我身從小不出戶銀簪雖掠鬢荆釵未成婦蘆
港深深孰來此擾擾紅巾照溪水無門別逃避有計深
拜跽奴願從將軍奴尚真處子辰良日吉禮所重野合
私從世應鄙紅巾不疑身免辱愛生者衆愛死獨銀簪
不刺股銀簪不錐目咽喉三寸氣出入此氣一斷難再
續君不見元運衰海宇析人男子官柱國抱持馬足慌
拜賊頭上朝簪長一尺

潭水清

洪春春死節

儂本村田居無城又無郭賊多孰備禦賊少亦驅掠阿
爺到新市說有官軍駐官軍快殺賊殺賊賊當懼從爺
提攜行忍死事遷寓一朝賊四合兵將走不顧東鄰金
帛盡西舍娥孃去獨存儂身走無及道旁空屋爺教入
兔面始藏伏援臂已持執驅至岸拉上船回思死清水
勝活污瀆間仙人潭深莫比一生事一口水

詩話水南博洽著聞留心風教詩不苟作予錄其三篇稍加刪汰墨布袍者宋咸淳進士福建提刑德清游汶魯望所服元初以遺老薦授福州總管固辭不就題袍背云前宋遺民今為百姓雖雨晴寒暑未嘗解脫卒葬果山銀簪詞者德清女子沈回奴際元末兵亂匿蘆港中賊獲之求合從容語曰我閨女也必擇日具禮乃可賊信之攜至營是夜拔頭上簪刺喉死潭水清者歸安女洪春春元至正十八年兵亂父引之避居新市賊至匿空舍中賊入將逼之女投水死三事國史失載因具詮之

孫偉二首

偉字朝望清江人弘治壬戌進士官至鶴慶知

府有鷺沙集

俞汝成云鷺沙詩有自得之趣而濟以精鍛信其可傳

詩話鷺沙詩格蒼老所惜未醇句如花邊釣艇
間依岸葉底潛鱗不避人三日泥穿東郭履六
年人住楚江城屠蘇又醉王正月童子不嫌吾
舊廬澗底山泉攜甕出蘿邊春雨課兒鉏大江
水漲孤城小遠道天寒一鴈稀夜久星河在檐
宇天寒鴻雁叫滄洲屋邊晴雨間禽識徑裏風
泉老竹當
具饒骨力

喜雨應吳大參

山下荒畬勢若焚山人望雨戴爐熏夜深初見月離畢
曉起忽傳江發雲造化驅雷從地出蛟龍卷海上天分

甌汚擬遂明農願敢作爭桑惱使君

留酌彭敬之

清江一月風兼雨那復過從問所親久別那堪經亂日
相逢還阻看花晨且將決戰東湖略細語躬耕南畝人
邂逅歸舟莫催急水烟猶殢岸頭津

俞泰一首

泰字國昌無錫人弘治壬戌進士歷官山東參
政有芳洲漫興集

題扇寄邊華泉

木葉迎風下孤亭傍水開何時尋舊約載酒過江來

范嵩一首

嵩字邦秀甌寧人弘治壬戌進士累官南京工

部右侍郎有衢村集

過太平府有感

滿汀芳草夕陽斜長恨春時不在家昨夜月明鄉夢醒
杜鵑啼上杜鵑花

徐泰 三首

泰字子元海鹽人弘治甲子舉人授桐城教諭
改蓬州學正遷知光澤縣有玉池臺

賣婦謠

東家賣婦江南去西家賣婦江南去肝腸寸斷兩不知
涕淚并作河流注哭聲震天天地悲道傍觀者各淚垂
人生不幸遭此時他家食却五歲親生兒

西陵峽歌

兩山夾江如壁立千尋萬尋青鐵色江流如龍山罅來
動地雷聲喧白日山高不見飛鳥過舉頭青天一尺多
蒼藤古樹翳滿目沿厓亂石其奈磊砢巉巖何嗚呼峽
中之險險莫比昔嘗聞之今信矣商人重利却輕生吾
獨何為亦來此黃陵廟下不可游空舫塌洞尤堪憂十
前九却過一險百夫力盡顛厓頭垂堂遠游古所戒靜
言思之心膽駭中流欲歌行路難哀猿又起寒烟外

枝江道中

水落枝江道風高歲暮天挂帆煙雨裏惆悵入川船

顧鼎臣一首

鼎臣字九和崑山人弘治乙丑賜進士第一累
官少保兼太子太保禮部尚書武英殿大學士
贈太保謚文康有未齋集

憫雨

丁丑夏六月災變良有由不雨土膏竭萬木焦林丘一
雨決旬朔日夜乃不休七月日五六氣候如高秋雨意

轉蕩湑勢欲漂燕幽街市潢潦集淺深可方舟汨沒間
閭失縱橫盆盎浮薪炭且莫購安辦米與薪哀哉彼窮
民衣食恃耕疇黍稷方垂花俄頃沉淵湫所存復幾何
公私尚誅求老羸力不克輾轉壑與溝妻孥互牽抱蓬
垢同繫囚且忍頃刻活未暇來日謀救死及扶傷哭聲
動城陬雞犬寂不聞但聞叫鵲鷗此變未可輕廣闊被
數州大都尚若斯僻壤焉能留少壯罷鉏犁行復事戈
矛細民本蟻蝨反面成虎彪往事足懲創弭變期交修

我時卧邸舍霑濡到衾裯起坐念蒼生汎瀾涕難收願
水洩尾閭上通天河流河邊有天孫來夕會牽牛肯以
下界苦懇與上帝不天聽或在茲蒼生具有瘳

謝 丕 一首

丕字以中餘姚人太傅遷子出嗣叔選弘治乙
丑賜進士第三除編修忤劉瑾削籍嘉靖初起
充日講累官吏部左侍郎

行樂歸

徙倚亭欄外何人共此杯春風知我意吹送小舟回

湛若水二首

若水字元明增城人弘治乙丑進士改庶吉士

授編修歷侍讀陞南國子祭酒禮部侍郎進尚

書改兵部謚文莊有甘泉集

顧玄言云先生詩
醞藉逸秀得唐人

古澹處

詩話文以載道詩以言志不詭于道勿納于邪
可也談理學者必借詩為證道之言若禪家之
拈頌說偈者然吾不得其解也司馬遷曰古詩
三千餘篇孔子刪取三百五篇皆絃歌以合韶

武之音則匪獨關雎鹿鳴文王清廟也凡鄭衛之詩皆合於韶武者也屈子之離騷至欲詒高辛之鳳皇留有虞之二姚捐玦于湘君湘夫人之下女其為無禮甚矣然志出乎正覽者謂其爭光日月杜子之詩篇至比母后于褒姒而顯斥其明眸皓齒目椒房之戚為麗人而形容及意態肌膚其亦不孫甚矣然志出乎正論者謂其一飯不忘君是說詩者亦觀其志之所存而已不必盡出于道德之言也元豐而後理學風雅截然為二大約多祖擊壤言情之作置之勿道如倚花隨柳何害于道程伯淳恐人之議之也緊接曰時人不識予心樂醉擁如花何害于情黃才伯恐人之議之也亟注曰欲盡理還之喻古之所謂發乎情止乎禮義者今之所謂發乎情必戾乎理學者也甘泉論詩推崇定山白沙以定山為精金千鍊謂詩法如是學者亦必

出于是吾誠
不得其解也

贈劉都閫

樓船簫鼓動秋清
劍氣寒光下紫冥
想得將軍經略暇
時時騎馬看潮生

送鄭汝高尹黟縣

黟縣縣前江可憐
青山四塞上通天
長官公暇鳴琴坐
不管桃花開縣前

顧應祥一首

應祥字惟賢長興人弘治乙丑進士累官南京
刑部尚書贈太子少保有崇雅堂集

詩話尚書仕不廢學含經約史維日孜孜其在
滇藩刊草廬吳氏尚書纂言萬里遺書鄭端簡
以序文商榷手蹟予及見之端簡為塗乙數語
并疏大旨于簡端本今藏予家集中詩不無蕪
累王元美許其似
白太傅亦微辭也

海寇

高皇啓天運龍飛當九五萬國盡來王惟詔絕倭虜惡
其性狡猾外服心跋扈所以備之嚴兵防遍斥鹵後雖

容入貢來往亦有數奈何海濱氓趨利者蠡午自決中
夏防勾引島夷部偵知我虛實公然肆侵侮攻城殺官
吏燎原損稂黍剽掠辱閭閻屠僇及乳哺結巢據險要
呼類益屯聚承平紈綺習詎識干戈苦聞風輒先奔墮
輒等盲瞽去年樵李敗慘極不忍覩浮骸滿溝渠行不
通商旅堂堂會城中三司列文武長驅且深入無人敢
撐拄坐令北關外一炬成焦土脅從半吾民如以翼加
虎元帥乃書生市兒充行伍縱有百萬家竟不能設弩

見說賊兵來城門已先杜十室九逃竄止遺馥與釜算
緡科兵田招兵沿門戶東南財賦區中病在肺腑天子
怒按劍新命改督府彼倭干天憲凶殘久自沮會見一
埽平四方盡安堵

崔銑一首

銑字子鍾安陽人弘治乙丑進士累官南京禮

部右侍郎贈尚書有洹詞

穆敬甫云文敏著洹詞人知工文而不知

工詩近體豪雋奇古足與李何方駕

詩話洵詞不載詩篇其見錄于選家亦少予得
公手蹟寄張子醇方伯者有上陵下陵諸作錄
秋風一首存豹一斑若云與李何
方駕則未見其全不敢臆定也

秋風

秋風何蕭蕭夜夜動林莽除畹本種蘭奈此艾蒿長

陸深五首

深字子淵上海人弘治乙丑進士改庶吉士授
翰林院編修遷國子司業進祭酒謫延平府同
知陞山西提學副使改浙江歷江西參政四川

布政使召為光祿卿改太常卿兼侍讀學士陞
詹事府詹事卒贈禮部右侍郎謚文裕有儼山

集

費子和云陸公詩歌雅而莊婉而諷左遷以後略無感時憤俗之意觀其發教巖詩云去

留俱有適吏隱欲中分此其心豈常有怨尤耶
王元美云陸子淵如入貲官作文語雅步雖

自有餘未脫本來面目
陳卧子云子淵氣尚清拔學非深造多輕淺之調

詩話儼山詩其原出于大歷十子平衍帖妥如
設伊蒲之饌方丈當前雖遠羶腥終鮮滋味至
其折東經史練習典章其所紀載可資國史采
擇昔朱晦翁譏葉正則知古而不知今陳同甫
知今而不知古惟許呂伯恭克兼之儼山亦可
無愧伯恭矣若夫正書似顏尚書行書似李北

海莫雲卿之論謂風力實出趙吳興之上自董尚書墨蹟盛行而儼山遂為所掩然尚書論書法推為正宗世有張懷瓘估直未必定取董而遺陸也

武鄉山中晚行

落日下西崦餘光在高樹水流青山中人行白雲處

歸塗絕句

日落山煙紫林深暝色寒殷勤問前路今夜宿新安

春日雜興

綠楊如綫草如茵紫竹肩輿白氎巾不是為春禁不得

老來心緒最憐春

中歲

中歲山林頗有情
柳條花萼弄春晴
日長無事江門外
獨立斜陽看水生

留別所知

世間好事一百一
春日麗辰三月三
此地故人還故國
他時江北望江南

張邦奇八首

邦奇字常甫鄞縣人弘治乙丑進士累官南京
兵部尚書贈太子太保謚文定有集

感遇

我昔見嫩人婉戀容色好貽我瓊玉鈎願言佩終老我
來旣已晚美人逝不返薄帷明月夜使我心悽惋芳蘭
何萎蕤采之將遺誰感彼嫩人贈銜恩空淚垂

迎春

閉門終日坐不知天地春鴻鈎一以動百物相鮮新憶

昨凋落時梅李各有仁如今發生氣亦復資綢繆達人
均四海愚者分比鄰嗟予二三友歡會當及辰我有一
尊酒可以陶吾真

送張君用之鶴慶

燕臺一尊酒送爾滇南行風塵萬餘里極目難為情故
人條已散落日玄蟬鳴曾無別離色可以觀平生

送王宜學編修謫官三河驛

若華照四海靄靄凝浮陰揮之不可得憂心日欽欽嶺

南多嘉樹隆冬見青林去去遠垢氛聊以澄煩襟綠衣
無怨言白華多苦心願子崇明德永言終令音

遊方廣寺簡嚴太史

勝會臻名流竒探極幽藪但覓方廣真不問厓蹊陡越
險倩松喬躋危病賁黝巖絕疑天低阨深詫坤厚陰風
潑地寒清溪挂厓吼燕石晴復飛蚪藤凍還走羣峰角
低昂亂石相牝牡獲勝古所歡行疲君莫咎君看廢寺
中釜廬僧骨朽朱張獨何人智勇名斯久

祝融峯

危峰踰萬仞衆峰不敢並到此得大觀超然稱心境捫
星或低頭望日不引領分明見員儀恍忽凌倒景時月
當坤陰霜林肅而靜我欲回陽春叩此祝融頂

鷹逐鷺圖

我觀羣鳥中除却蒼鷹盡凡羽君不見黃金眸白玉距
凌空一下急於雨鷺鷥何不早竄伏到此驚奔向何許
憶昔在林皋翻飛矜羽毛羽毛雖好不中用憑君識取

真英豪

送王石沙侍御按閩

金門冠蓋下晴曛一騎青驄萬里雲
明到閩山正秋色玉簫吹向武夷君

徐縉 三首

縉字子容吳縣人弘治乙丑進士歷官吏部左侍郎兼翰林侍講學士謚文敏有集

詩話文敏與獻吉仲默昌穀俱深攬環結
綬之好詩雖平行較王錦夫孟望之似勝

送徐昌穀使湖南二首

鴻鴈惜離羣，嗷嗷鳴不已。如何平生親，奄忽去千里。懷哉可奈何，王事有端委。城南走相送，意逐東流水。駕言度前岡，迤邐歷河涘。道路阻且長，嚴程自茲始。贈子以瓊瑤，酬我一端綺。

昔與子北征，嚴霜拂貂裘。今子遽行邁，春水浮蘭舟。永懷會晤好，重此離別愁。出門望千里，楊柳倏已抽。想見歲月積，回首瀟湘秋。遙窺九疑山，近賦黃鶴樓。嗟哉滯

一方安能從子游

感遇

朝旦別燕京景落憩吳船揚舲發潞渚伐鼓信洄沿芳
蘭已衰歇歸鳥紛飛旋颼颼風揚沙皚皚冰塞川黃雲
結四野白霧縈三邊顧瞻望城闕參差御飛軒撫化心
愴惻覽物淚潺湲行行指舊山枕駕從所便

周廣一首

廣字充之崑山人弘治乙丑進士以監察御史

劾錢寧貶懷遠驛丞移知建昌再謫竹寨驛丞
寧誅復官仕至南京刑部右侍郎贈右都御史
有玉巖集

遺辰州張尹

江口風逾急孤舟日已西多情江上月相送過辰溪

黃輦七首

輦字伯固莆田人弘治乙丑進士官大理寺丞

天啓初追贈少卿謚忠裕有後峰集

林雨可云
先生詩直

而多思澹
而自然

山中吟

春山澹無姿春雲濕將雨
隔林有人家知是雲深處
雲深山徑微欲往疑無路
不如山中人只在山中住

襄陽即事

斷岸移沙嘴江城倚漢濱
山光餘照日花艷近逢春
勝地登臨遍東風感慨新
不知耆舊傳更有姓龐人

冬日書懷

獨立蒼茫裏悠悠一轉蓬風塵連歲儉湖海又塗窮野
曠飛鳶急沙寒落鴈空思君何處所斜日下簾櫳

謁潁考叔墓

封人千載後坏土覆孤墳天下誰無母如公亦愛君黃
泉歌大隧白谷翳寒雲曠世予心感西風日又曛

閔子祠

青山環故冢古木護朱闌師友諸科最親闡一子寒里
名今不改廟貌久猶完茅土雖封費終非季氏官

偶成

三十功名四十歸山林已自落塵機
罪當萬里投荒服恩許終身作布衣
雨宿風餐歸路棘東封西祝諫書稀
扁舟不道江湖遠回首燕雲是帝畿

芋園發舟

西風又作扁舟客沽酒沙頭對夕暉
岸轉青山背人去江空獨鳥向人飛
十年塵迹今衰鬢九月嚴霜尚袂衣
望極紫宸天萬里未容回首戀柴扉

孟洋三首

洋字望之信陽人弘治乙丑進士除行人選為
御史坐論張桂詔下獄謫桂林教授遷知汶上
縣再遷嘉興府同知陞湖廣僉事引疾歸旋起
山東僉事進參議轉陝西參政拜僉都御史巡
撫寧夏改理河道終南京大理寺卿有有涯集

杜子材云望之標格氣骨頗有矩矱王元美
云孟望之如貧措大置酒寒酸澹泊然不置腥
羶穆敬甫云孟詩逸氣超羣橫不可制與仲
默同生一區足稱二美顧玄言云大理調雅

詞綺高響奇絕彷彿天台石梁羅浮水簾黃
清甫云洋詩善叙事長歌宛轉相屬而意不竭

但少

道耳

詩話左孝廉舜齊獻吉外弟也孟大理望之仲
默外弟也左詩近膚孟詩太淺比于郎伯邈若

淵雲

贈朱生

與子別離時乃在灘水陽灘水東西流往櫂無回檣還
顧桂山隈城闕鬱相望修衢帶廣陌車馬如雲翔子居
貧士里散帙空盈牀歲久塗路仄思心阻且長一朝時

運會奮飛游帝鄉
戢翼復南旋
問我來建康
驚喜如夢寐
顏色各已蒼
衷情未云極
話言詎能詳
行行度湘川
采掇多蘭芳
無以遐遠故
聊寄莫相忘

九日次邊青厓太常韻

落帽憐高興
銜杯意轉哀
葉辭霜後樹
人上雨中臺
為客悲秋盡
思鄉見鴈來
百年幾佳節
又負菊花開

荅高大和侍御寄書

舟過衡陽鴈已疎
經年那得故人書
一封忽漫來何處

千里殷勤問謫居海上青驄遙羨汝湘南芳草正愁予
清秋直北朝星斗回首雲山萬疊餘

殷雲霄七首

雲霄字近夫壽張人弘治乙丑進士授靖江知
縣調青田陞南京工科給事中有瀛洲芝田二

集

朱中立云石川詩得初唐體裁海嶽之奇氣也王元美云殷近夫如越兵縱橫江淮間

終不成霸穆敬夫云殷君與太白山人多倡和宜其風度似之俞汝成云石川氣逸才雄

思奇語勁騷壇一勁敵也顧玄言云給事菁藻時髦才情道麗李時遠云近夫豪雄逸宕

不羈之才

詩話近夫如傳寫手欲開生面而神采未
工然風格自存終不作鋪眉苦眼求似

感遇

孤鳥失其林日暮鳴且飛
風枝棲未定搖搖將安歸
中洲有芳草慘澹少光輝
舟楫蕩流波根株苦無依
悲此遠征人三代故鄉違
萬里長塗間安知身是非
東海有釣綸西山可采薇
悠悠迷方子誰能識其幾

長店

大風揚塵沙白日昏林丘前途浩莫辨聊此停吾舟崇
岡蹲狐狸高樹鳴鸛鷀我欲驅之去惜哉無弓矛鸞虞
嗟已矣此輩今何求

夜登定山

朝泛桐江水夜躡定山石延蘿踞虎豹噓波動潮汐俯
闕馮夷宮疑入羽人宅林靜江有聲雲昏岼無迹懷哉
坐哀聽戚矣闕遠覲風勢依峰峻月色連江白飛鴻鳴
遠浦潛蛟舞深澤飄飄千里舟脈脈獨遊客乘桴嗟有

志棲巖悲失策薄宦竟何有幽期誰與適覺迷道有獲
含欲情無逆眷言詠白駒聊以慰今夕

宿江陰得太初書

侵晨發毘陵薄暮及江陰積雪明高原歸鳥喧前林孤
舟風雨夕大江雲霧深遙遙越鄉感脈脈游子心美人
隔江浦寤語安可尋情至物有合離析領瑤音愛賞欣
自古慕羣悲獨吟寄言狂歌客一尊待吾斟

虎丘寺

落日青山外浮雲滄海邊江山皆勝迹樓閣自人天碧
草生公塔丹厓陸羽泉平生獨往志欲老翠微顛

杜楊劉三君子攜酒過官舍次杜韻

縣齋微雨過蒼苔越客芳尊向晚開池畔好風驅暑去
松間明月逐人來三年戎馬身無定千里鄉書鴈未回
痛飲狂歌聊復爾不堪愁病兩相催

漫興

二月澄江春水深北孤山頭雲陰陰北孤山頭雲作雨

我欲渡江愁我心

倪宗正 二首

宗正字本端餘姚人弘治乙丑進士選庶吉士
出知太倉州入副武選諫南巡受杖知南雄府
有小野集

題網魚圖

白白江波紅尾魚蒲花初發柳花疎江洲日暮忘歸去
江魚上網不知數風雨欲來猶不來
簑笠且挂磯頭樹

為顧新山題畫用思道韻

久住水東溪欲往水西去一夜春草生溪路無尋處

孫泰一首

泰字時寅歸安人弘治乙丑進士官刑部郎出

知成都府改充州有龍溪藏橐

詩話龍溪守充日康陵南巡中涓苛索供億請以身充役時同里蔣公瑤守揚州衛民甚力扈從貴人相誠謂湖州人難犯及龍溪卒檢視篋中僅圖書數卷衣數襲而已蔣公廉節略同今兩家子姓氏微已甚信夫廉吏不可為也

西江道中

九月菰蒲色尚清芙蓉深淺漾沙汀一行新鴈從天落
我欲圖歸作畫屏

索承學一首

承學字遜夫邳州人弘治乙丑進士戶部郎中
有桐岡集

西樓晚眺

在家無事不勞生暫倚危樓看夕晴雲裏樹含山外寺

渡頭人語水邊城
荒村茅屋秋砧早
野店漁家晚炊明
吟罷新詩還自和
西風吹落塞鴻聲

安磐一首

磐字公石嘉定州人弘治乙丑進士改庶吉士
授兵科給事中進都給事中議大禮被笞免官
萬歷初追贈太常少卿有頤山集

詩話公石集句最工惜所著頤山集詩話罕傳
楊用修述其論詩之旨云唐之名家自立機軸
譬猶羣花各有丰韻乃或翦綵以像生或繪畫
而徇引終非真也又云論詩如品花木牡丹芍

藥下逮苦棟刺桐皆有天然一種風韻今之學杜者紙壯丹芍藥爾其說足以解頤

題畫

百里同雲雪滿蓬冥冥那復計西東輕舟不畏邪溪水
朝定南風暮北風

張寬二首

寬字德宏太倉州人弘治乙丑進士廣東按察

僉事

周復俊云張公不以詩名而標韻自遠

大駕南郊

行殿彤雲合晴郊綵仗攢鑪烟香細細羽扇影團團禮
樂從周典威儀盛漢官帝壇風露肅轉慮聖躬寒

早朝

曉日含青陸疎鐘散紫煙聞雞頻視夜騎馬獨朝天馳
道千官肅梯航萬國先御爐香不斷長繞翠華邊

周宣
一首

宣字彥通莆田人弘治乙丑進士除常德推官
擢監察御史巡按山西諫南巡不死後出為山

西提學副使遷廣東按察使坐事免有秋齋集

聚書樓

樓外長河練帶斜
河頭水氣欲蒸霞
誰家艇子捕魚過
衝落小桃一樹花

林文纘一首

文纘字德緒候官人弘治乙丑進士歷官湖廣
布政司參議有漱芳集

再入計

冒寒發江郭隨衆述所職驅車策駕馬夙夜不遑息行
山歷峻阪遡川履深澤昔來楓葉青今往霜林赤郡縣
本舊游轉盼非疇昔新知多遷除故吏半更易惆悵時
物移銅符猶未釋服役職所任詎歎如蓬跡耿耿懷抱微
誠天顏期再覲

田登二首

登字有年長安人弘治乙丑進士河南參政有

偶山集

明妃曲

明妃遠嫁靜邊塵一曲琵琶萬里身惆悵西風千古恨
封侯談笑是何人

巴東峽

晚泊孤舟春水生遠灘雙檣片帆輕消魂一覺鄉心夢
卧聽四山風雨聲

方獻夫一首

獻夫初名獻科字叔賢南海人弘治乙丑進士

改庶吉士累官少保兼太子太保吏部尚書武
英殿大學士贈太保謚文襄有西樵遺藁

閒居和杜子美韻

問徑隨春草支筇入午雲歸來陶靖節多病沈休文花
氣單衣稱松陰小簟分悠然天地別白日絕塵紛

嚴嵩十六首

嵩字惟中分宜人弘治乙丑進士改庶吉士授
編修累官禮部尚書少師武英殿大學士有鈴

山堂集

張文邦云少師詩中典則其聲鬱律而不忮其出恬澹而有餘足以經緯風雅

仲之問 王子衡云介谿詩思冲邃間遠在孟襄陽伯唐虞佐云崆峒子評介谿詩曰淡石

潭翁評介谿詩曰達達者其辭和淡者其辭平和平之音其于古作者庶幾矣 劉介夫云鈴

山集詩宣志理情和聲昭則渢渢乎魏晉遺音 崔子鍾云惟中詩清婉而綺不浮其質 孫

鷺沙云鈴山格致高古韻度深遠屬辭景中游情言外無近時膚脆之習而氣機員轉精采華

妙往往自見于繩法之外 楊用修云介谿春容大篇寒瘦輕俗不入其胃次 皇甫子循云

少師詩達而和澹而平明潤而婉潔 顧玄言云相云嚴詩清奇固聲律家所不廢 穆敬甫

君多秀句大率多類錢劉 陳卧子云嚴相氣骨清峭應制諸篇頗為雅贍特東濕寡自然之

致爾

詩話弘治乙丑殿試泰陵焚香祝天願得良輔
不意是楠乃有分宜吁可怪也然分宜通籍即
見知于獻吉仲默旋請假還里讀書鈴山者七
年獻吉遠訪之山中作鈴山堂歌以贈于時子
衡華玉廷實子鍾允寧應德輩交相引譽又走使
萬里索用修點定其詩可稱好事矣其與友人
贈荅詩云自非肉食相藏拙安所宜又云故園
多所歡薄宦何為者贈相士顏生云本無慕澤
輕肥念不向唐生更問年一似恬澹自持無意
榮利者迨爰立之後驕縱貪黷忽懷恬湣失其
本心終以致敗暮年自序詩集云晚登政塗百
責身萃回憶舊業如弁髦然觸口縱筆率爾應
酬不能求工亦不暇求工也對應德亦云少于
詩務鍛鍊組織求合古調今則率吾意而為之

耳分宜能知暮年詩格之壞而不自知立身之
敗裂有萬倍於詩者生日詩猶云晚節冰霜恒
自保昧心之言將誰欺乎而應德翻謂不煩繩
削而合若湛元明一序讀之尤令人張目不意
講學者貢諛乃若是王元美樂府變云孔
雀雖有毒不能掩文章殆平情之論乎

贈友

北風吹層波高帆疾於馬矯首望雲山日夕到鄉舍親
友慰遠歸春杯正堪把故園多所歡薄宦何為者

阻雨不得登蟠龍

溪上風雨來颼颼篁竹亂油雲翳層峰對面隔霄漢鳥

道紆百盤龍門在天半佳期恨緬邈寒望增淒斷下馬
憩林居一顧屢長歎自無飛仙術安得凌絕觀

常甫憲副欽之翰檢與予先後登嶽欽之獨值雨

同賦

祠謁朝景暉峰登雲物變今朝山中客零雨罷平聲登踐
林深厓路窄幽賞不可遍磴滑危難步谷暗近莫辨茲
山號靈幻頃刻殊隱見叨余上晴巒萬狀悉輸獻愧之
攜毫賦琢句被厓蘚君侯擅風騷胸中富溪壑佳辭出

天巧不復勞洗鍊巖巒閼輝彩草樹迷蔥蒨豈被山靈妒或遭造物譴並覲欣茲奇獨往惜已殿期君嗣芒屨言保筋力健

金山

寺擁金山古江流碧海深千年此形勝詞客幾登臨波浪浮香閣魚龍聽梵音晨風渡舟楫真有濟川心

西陵觀月

萬古秋天月西陵午夜看影流蒼柏罅光滿碧雲端節

序逢搖落山河對鬱盤憑高瞻玉宇正憶鳳樓寒

冬閨和李宮諭

歲閨移陰律寒深值晚冬市飈連九陌樓雪俯千墉宮
醞閒能醉鄉書病嬾封虛慙殿門藉寂寞卧高春

崔子謝病還懷寄

相送出郊寺獨歸愁郭門春城涉遠道朝雨戀芳樽幽
夢時或到素心誰共論若為經濟略歸卧水雲村

過彭城

十月彭城水臨觀勢渺漫客帆牽樹杪日夕畏風湍
汴泗流爭長魚龍卧未安無人守茅屋寂寞傷江干

發宜春風雨枉諸公出餞別後懷寄

出郭衆峰暝蕭蕭風樹鳴嶺危攀磴上橋斷涉溪行
四壯勤王事三湘問楚程郡齋山霧裏回望渺層城

盧溪謁周元公祠

古鎮無監稅高賢有奉祠位卑名德重世遠士民思
風月盧溪迴衣冠宋代遺停驂肅瞻拜敢惜去程遲

石期驛逢李明府

清苦東安令心期得共論
官看銅綬貴貧惜布袍溫
野樹依巒嶂春江對驛門
天涯一攜手風雨送離樽

謁孝陵

社稷戎衣定梯航玉帛朝
睹河功戴禹瞻廟祀宗堯石
馬嘶空翠金燈照寂寥
遙看鍾阜上御氣滿層霄

同徐郡侯登浚渠亭

渠在郡城西唐刺史李將順
所鑿民賴其利目為李渠

湮徐浚之築亭
其上侑有龍祠

徐侯亭子李侯渠水石新呈宿莽餘秋淨野田聞鶴語
雲深仙洞隱龍居驅馳暫駐三湘節登賦初陪五馬車
此日佳遊習池共他年故事峴山如

山塘

山塘深且廣邈迤抱山麓隔浦見人家依依桑柘綠

出仰山

鐘聲在山間客子出山去細雨濕春衣新寒入高樹

送顧使君華玉赴全州

吳客孤帆楚水涯
碧雲千里度長沙
湘山獨夜看明月
莫聽猿聲便憶家



明詩綜卷三十三